

李文忠公奏稿

李文忠公奏稿

卷之四十九目錄

修理熱河宮牆摺

光緒十年正月十七日

借款購備鎗礮摺

光緒十年正月十七日

機器局奏銷摺

光緒十年正月二十一日

帳房折價片

光緒十年正月二十一日

黃河修防分別造報片

光緒十年正月二十一日

滇銅運京腳價片

光緒十年正月二十一日

長蘆欠款仍難啟徵片

光緒十年正月二十一日

海防開支輪船薪糧摺

光緒十年正月二十一日
附清單

請撥南漕濟賑摺

光緒十年正月二十九日

覆奏黃河口門用機船片

光緒十年正月二十九日

議覆吳大澂赴粵摺

光緒十年二月初四日

變通朝鮮貿易章程摺

光緒十年二月十六日
附朝王覆文

查覆滹沱南岸情形片

光緒十年二月十六日

學生王慶端請卹片

光緒十年二月十六日

非運河工程摺

光緒十年三月初二日

酌保邊材籌濟軍火摺

光緒十年三月十七日

覆奏周盛傳參款片

光緒十年四月初四日

議分慶軍駐朝片

光緒十年四月初四日

議馬頰河不宜開摺

光緒十年四月十六日

議濟宜惠河摺

光緒十年四月十六日

請飭東撫築德州隄工片

光緒十年四月十六日

奏留盛宣懷片

光緒十年四月十六日

本年二月以前賑捐收數摺

光緒十年四月十六日

法越交涉議定法約摺

光緒十年四月十七日

奏保馬建忠片

光緒十年四月十七日

添設山海關電綫摺

光緒十年四月二十四日

請緩鹽課奏銷摺

光緒十年四月二十四日

李文忠公奏稿卷四十九

全集一之四十九

桐城吳汝綸編錄

修理熱河宮牆摺

光緒十年正月十七日

奏為遵

旨籌款修辦熱河

避暑山莊宮牆及泊岸堆撥等要工恭摺覆陳仰祈

聖鑒事竊臣欽奉光緒九年十二月二十三日

寄諭繼格奏熱河避暑山莊宮牆及泊岸堆撥三項工程勢難延

緩請於明春修理著李鴻章籌款辦理等因欽此伏查熱河工程

前經臣遵派候補知府陳慶滋馳往會同熱河道府詳細查勘稟

覆又令陳慶滋來津反覆籌議擇要商辦擬挑潛武列河正身將

河內挑出石子沙泥於西岸十丈外堆攔以約漫水再察酌於西

岸改道河頭加築攔水壩使水歸故道約需工費銀三萬數千兩
飭司設法挪款濟用卽令陳慶滋核實籌辦至西岸原有石壩十
二里計應修者一千十餘丈約合銀十七萬八千餘兩

宮牆塌缺應修者湊長二千八十餘丈約合銀五萬二千餘兩石
泊岸並迎水橋壩衝壞應修者湊長六十餘丈約合銀一萬九千
餘兩堆撥應修者三十八處約合銀三千餘兩統計石壩

宮牆泊岸堆撥四項共約估銀二十五萬餘兩工大費巨直庫艱
窘無力兼顧臣於上年十月間奏請

敕部核議另行籌辦嗣經戶部奏稱部庫未裕各省亦難措無餘
若添撥此項巨款無論各省籌解未必應手卽使戶部悉心搜括
各督撫竭力報解設或意外之需有重於此項工費者不敢不預
爲之計請緩俟今歲春融由部酌度時局再行籌湊的款奏辦等

因奉

旨依議欽此欽遵在案茲據熱河都統繼格目擊情形以石壩可暫緩修惟

宮牆泊岸等工均屬緊要不能延緩又奏奉

諭旨著臣籌款辦理伏查

闕庭重地尊藏

列聖手澤御物

宮牆與泊岸堆撥皆所以衛護

闕庭現既坍塌缺口內外相通不足以資保護誠如繼格所奏修理未可再緩惟值時艱帑絀巨費難籌直隸向係缺額豐年尚不足用況洪水大浸之餘災區過廣窮黎極多錢糧大半蠲緩又須另籌冬春賑撫銀數十萬各庫已搜羅殆盡實屬萬分竭蹶今

宮牆泊岸堆撥三項工程按照陳慶滋等原估共需銀七萬六千兩爲數不少昨藩司崧駿來津面商春撫臣復與再三籌議據稱司庫應放各

陵俸餉各營兵餉暨一切急不可待要款必須及時應付卽前議挑濬武列河正身並築攔水壩銀三萬數千兩尙無的款可指勢不能再籌七萬六千兩之多但工關緊要旣欽奉

諭旨飭辦臣等義無膜視敢不於萬難之中設法挪湊不得已商飭該司於八項旗租及旗產錢糧項下移緩就急竭力勻撥銀三萬八千兩計尙短銀三萬八千兩委實無可再籌查此工尙撥內帑興辦本年長蘆鹽課奉撥京餉銀二十五萬兩現在尙未起徵擬飭運司額勒精額先行借墊銀三萬八千兩劃抵本年京餉得以湊濟要工如此一轉移閒款項旣可有著工程及早興修

宮牆藉資保護亦免部臣月撥協款致有停工待款之虞仰懇
天恩俯准照辦俾無遲誤臣卽飭陳慶滋前往將此三項及前議
挑武列河築攔水壩工程一併分別確細覆估責成該員會同熱
河道府迅速核實籌辦熱河被災甚重此次興工卽集附近災民
計口授食以工代賑所需工料各價必應按照時值隨宜酌給難
執例章相繩直隸歷次工賑皆奏准免造銷冊核實辦理此項要
工事同一律應請俟事竣專案開單奏報仍免造冊題銷以省繁
費臣當嚴飭承辦之員就款籌節力求堅實不准絲毫虛糜仍分
別取具保固切結送部查核至石壩工程太巨既可暫緩議修將
來應由部臣酌度時局月籌的款奏辦以符原議所有設法籌款
辦理

宮牆泊岸堆撥等工緣由是否有當理合恭摺覆陳伏乞

皇太后

皇上聖訓示遵行謹

奏

借款購備鎗礮摺

光緒十年正月十七日

奏為籌購西洋火器暫由出使經費項下借款墊價恭摺仰祈

聖鑒事竊惟中法相持迄無定局越南山西之戰滇軍與劉永福所部憑城固守殺傷相當卒致退舍非糜戰之不力實器械之未精西人製造後膛鎗礮日新月異其速率之猛準頭之遠幾於無堅不摧天地肅殺之氣與人世機巧之心相尋無已而彼得以其時出奇角勝我仍因陋就簡狃於制梃撻兵之常談而不思變計得失利鈍之懸殊不待煩言而決矣臣忝領非洋無日不以選械詰戎為事每與西將及出使諸臣周諮博訪一名一物必參攷眾說而切究之積有歲月竊識端倪蓋簡器於數萬里重洋之外非熟悉其名目之新舊機括之堅韌則所得皆他人唾餘徒糜費而無濟於實用近年購置新式後膛鎗礮皆令駐德大臣李鳳苞及

德商斯米德訂造頗能耐堅適用天津淮練各營均一律更換仿照西法操練步伍取準精益求精而滇粵閩浙防軍既少命中致遠之器卽如何操法如何用法似亦未甚講求去冬因桂軍器械缺乏會由臣營勻撥後膛鎗礮運往粵東以資關外應用惟沿海處設防斷非北洋一隅之力所能長此接濟總理衙門與臣函商以爲多增無益之軍不如多置有用之器屬與洋商剋期訂購以備滇粵閩浙等省要需所需價值卽於出使經費項下暫行挪付將來何處需用鎗礮卽由何處按價撥還誠爲通變權宜之至計臣卽督飭軍械委員與斯米德酌訂合同分投德美奧各廠定購克鹿卜後膛過山鋼礮一百二尊哈乞開司六響後膛快鎗五千桿毛瑟後膛步鎗五千桿應配子彈佩帶架具零件俱全分別限期運解來津約其價銀四十餘萬兩隨飭江海關道於出

使經費項下分起借付查過山礮於南方行戰最宜哈乞開司毛瑟等鎗為德美各國著名精器俟購運將到臣卽咨商滇粵閩浙各督撫臣先定分撥之數並令按照原價籌款領器以清借項仍俟還款有著再行訂購則要款既不至虛懸而利器亦陸續增備洵屬一舉兩得惟後膛鎗礮機件靈巧操法尤極精詳各省得此有用之器果能嚴督將士細心練習於以折衝制勝庶幾稍有把握耳除將價目細數分咨總理衙門戶兵二部查照外所有借用出使經費購備西洋火器緣由理合繕摺具陳伏乞

皇太后

皇上聖鑒謹

奏

機器局奏銷摺

光緒十年正月二十一日

奏為天津機器局光緒八年分動用經費各款循案開單奏報恭摺仰祈

聖鑒事竊查天津機器局經費奏明動撥津海東海兩關四成洋稅作正開銷光緒六年九月經臣奏明由戶部月撥邊防餉銀一萬兩接濟截至光緒七年分止業經督飭局員將支銷款目查照歷屆成案開列簡明清單具奏並飭將每年成造軍火器具數目造冊咨送總理各國事務衙門備查在案臣查上年戶部奏定章程光緒八年十二月以前各省未經報銷各案向開單者仍開單等因茲據承辦局務津海關道周馥候補道許其光潘駿德等詳稱光緒八年因舊建蒲口藥庫儲藥已滿復在韓家墅地方勘建新藥庫一所規制與蒲口無異舊建鑪水廠鉛房尙小復建新廠

一所以鉛房六間蒸氣用料少而出水多最爲合算機器庫硝庫
鐵庫既庫樓住房約添四十餘間廠棚三十間局東面移拓開牆
共築新牆四百四十丈濬河培隄以資環護此建置廠庫大略也
仿造神機營應用車牀等二十座各營局礮車架地車等三十八
副局內自造開彈槽絡電綫等器十餘座此增製機器大略也製
成軍火計仿西洋各式火藥六十八萬九百二十五磅銅帽二千
八百十萬顆毛瑟後膛鎗子三百六十六萬五千顆修成洋鎗三
千四百四桿前膛開花疑鐵礮彈一千七百四十二箇後膛銅箍
銅托礮彈七千三百二十六箇鐵羣子一百五十箇各式銅引八
千三百五十八箇熬煉錫水碾捲銅皮共四十二萬餘磅雜器分
晰約成三萬五千餘件近年海防各船多係新式巨礮子彈大至
五百餘磅往往一彈兼數十彈之工銅引亦然其演放水雷所需

電器電綫如法仿製均有成數一切動用經費上屆報銷案內原
存銀三萬十一兩三錢七分二釐五毫五絲七忽存料約值銀二
十萬二千兩本屆八年分共領海關四成洋稅及部撥邊防餉銀
二十六萬六千兩又收各省劃還軍火等價銀三萬一千七百六
十八兩二錢二分二釐共支用銀二十六萬六千九百六十九兩
五分一釐一毫七絲四忽仍存銀六萬八百十兩五錢四分三釐
三毫八絲三忽存料約值銀二十萬五千兩歸光緒九年分接支
惟製造向宗西法器料半出外洋並無例價可循支撥各船局各
款並屬要需與局中用項均係竭力撙節實用實銷毫無浮冒開
單籲請援案具奏前來查該局八年成造之件大致與前年相
仿工程興作較繁而用項頗爲節省據詳各節臣覆加查覈委無
虛飾相應按照向章繕具節冊清單恭呈

御覽合無仰懇

天恩敕部查照成案准銷除分咨戶兵工各部暨咨總理各國事務衙門備查外所有天津機器局光緒八年分動用經費據實開單緣由理合恭摺具陳伏乞

皇太后

皇上聖鑒訓示謹

奏

帳房折價片

光緒十年五月二十一日

再准工部咨准勇馬步營哨帳房水師帳篷向係製造本色給發光緒七八兩年改發折價經部於核銷准勇第十案軍需摺內聲明嗣後仍應製辦帳房此次八年分案內折價應咨該督自行酌核辦理等因臣查准軍馬步營哨帳房水師帳篷於光緒七八兩年改發折價係因駐防各有定所搭蓋營棚棲止以避風雨暫從各營所請因時制宜折價給領以便自行搭蓋修理仍與帳房例價無浮迨九年春各營間有征調仍一律製造本色給發所有八年分折價早經放訖於第十一案造冊報銷

奏咨在案若改爲製造本色請銷必多遷就轉非核實之道自應仍照准銷嗣後征防營哨概以製造本色給發以清界限理合附片具陳伏乞

聖恩敕部查照謹

奏

黃河修防分別造報片

光緒十年正月二十一日

再准工部咨開光緒元年起歷屆東明黃河南隄修防用款應按
限造報等因當經轉行核辦茲據大順廣道恭鈞詳稱東明黃河
南隄係於光緒元年勸民創築次年調派淮練各軍加高培厚所
需津貼民夫及搶險椿料犒賞等項除山東撥款由該省奏免造
報外其餘山直籌給奏明就款開除一體免其造報至二年以後
直省修防用款係按照直隸附省隄河成案於汛後開單奏報無
庸估銷截至八年止均經奏奉

諭旨允准今查歷年辦工各員或已升調或因事故離直勢難紛
紛調取且當時未悉河防規例皆係實用實銷現今補行造冊如
仍據實開載則與歷次奏報清單毫無區別重複造報徒繁案牘
如改照例價則必牽合通融不足以昭核實應請自光緒九年起

仿照豫省黃河例案成規造具冊結估銷其八年以前已經准銷用款仍無庸造報以免紛更等情具詳前來臣查東明黃河工程事屬創辦從前僅令練軍遇汛到工汛過歸伍並非專責防隄無從預期估報事後造銷旋因溜勢日益南趨險工疊出於七年始設廳汛一切皆係試辦實難牽合成例所有八年以前用款經臣隨時考察毫無虛糜均經開單奏報欽奉

俞旨免造銷冊在案自應無庸再行造報俾省繁費其自光緒九年起應令該道廳仿照豫省黃河例案成規造銷以清界限除八

年以前准銷各案奏報緣由及奉旨日期分晰詳敘咨部外理合附片具陳伏乞

聖鑒訓示敕部知照謹

奏

滇銅運京腳價片

光緒十年正月二十一日

再准戶部咨開滇省試辦京銅到直後由津運通應需水腳等銀
應按起分晰造冊送部核辦等因當經轉飭遵照茲據藩司松駿
津海關道周馥天津道裕長詳稱滇省從前辦運京銅由津起剝
均係該省運員自行經理天津縣僅代雇船隻所需剝費亦由滇
省報銷今改由海運部議由直將自津至通運費核實酌定給發
當因直省並無轉運滇銅支銷案據擬照采買洋銅運京成案每
起一百萬斤支給水腳銀一千二百四十兩旋准部覆令將由津
至通剝費按照以前辦運滇銅之例給發其由紫竹林至天津縣
應需腳費查明程途若干照采買洋銅腳費銀數計算該司道等
查采買洋銅成案自紫竹林運至通州每百斤准銷水腳津錢九
百文計每里應支津錢二文七釐一毫合銀七毫七絲今滇銅每

起一百萬斤自紫竹林運至天津縣十二里應支水腳銀九十二兩四錢又例載銅鉛起剝由天津縣至通州每百斤給銀六分九釐以一百萬斤計之每起應支銀六百九十兩又每起雇繆工價銀二百四十兩又由紫竹林卸船上棧每百斤例給背銅夫價銀三釐每起應支銀三十兩又入棧雇夫收銅過秤儲堆捆包每百斤給夫價銀一分每起應支銀一百兩又由紫竹林離棧下船每百斤給背銅夫價銀三釐每起應支銀三十兩綜計每起滇銅一百萬斤由紫竹林運至通州例支剝費夫價等銀一千一百八十二兩四錢惟雇備夫船一切皆須民價抵通後又應等候交卸另給船戶津貼例價較少已不敷用若再按減放章程祇發六成實銀所短過鉅轉運必致為難請將每起例支剝費夫價等銀一千一百八十餘兩按照十成實銀給發等情具詳請

奏前來臣查所詳係屬實情應請准給十成賞銀以示體恤庶免經手之員虧賠別滋流弊理合附片具陳伏乞

聖鑒訓示敕部查照謹

奏

長蘆欠款仍難收徵片

光緒十年正月二十一日

再長蘆應徵補欠積欠二款係嘉慶道光以前參商欠項於道光二十八年清查案內議令現商按引攤交前因商累已深奏准自同治十三年起停徵五年嗣復推展五年在案扣至光緒九年十二月限滿據運使額勒精額詳稱現值時艱帑絀多籌一分進款卽多濟一分之用此項補欠積欠但可設法收徵必應竭力催繳無如道光二十八年增定科則以後又加徵復價等項核計每引交款過多本甚喫力且引岸頻遭災歉去年夏秋復被大水銷滯運艱鹽價繩席車船腳費無不昂貴綱情益窘本商應完課款尙未能依限全交實無餘力代還遠年參商舊欠業將蘆綱艱苦情形疊次詳奏有案若將補欠積欠遽議啟徵各商萬難支拄必礙現年課款據通綱商人懃情籲請推展該司詳加體察不得不從

緩議徵請照案自光緒十年起展限五年俟限滿再行察酌核辦
等情具詳前來臣覆核係屬實情應請准如所詳辦理藉紓商困
所有長蘆補欠積欠二款仍難放徵請展限五年緣由理合附片
具陳伏乞

聖鑒訓示謹

奏

海防開支輪船薪糧摺

光緒十年正月二十一日

奏為北洋海防經費項下開支現有各輪船薪糧公費數目開單仰祈

聖鑒事竊准兵部咨輪船支款章程有未經奏明者應令奏明核銷等因當經轉行遵照茲據海防支應局司道詳稱光緒元年至六年北洋海防經費報銷案內開支輪船薪糧公費係龍驤虎威飛靈策電鎮北鎮南鎮東鎮西蚊礮船八號及水雷小艇一號其龍虎霆電四船業於光緒六年二月撥赴南洋調遣該四船薪糧公費自是年三月起由南洋支發光緒七年以後先後購到超勇揚威快砲船兩號鎮中鎮邊蚊礮船兩號並由閩廠咨調來津修改練船之威遠康濟兵輪船兩號調赴朝鮮旅順等處差遣轉運之海鏡商輪船一號及在滬製造之快馬小輪船一號在津製造

之利順小輪船一號守雷下雷所用之暗輪包銅小輪船兩號均歸北洋海防經費項下開支內鎮中鎮邊兩船先由北洋墊給俟山東撥解歸還此陸續購調各船之數目也事屬創辦應需薪糧公費均爲向例所無必須再三參考酌定是以先未詳奏惟光緒六年以前各船支數業於七年三月開分晰造報總理衙門戶部有案近又遵照新章月造分銷清冊詳請各部至調赴南洋龍虎靈電四船既於六年三月以後歸南洋支發其支款有無變通應由南洋核辦外合將北洋現有各輪船支款章程詳細開單呈請奏咨等情具詳前來臣查北洋創設水師購置蚊礮快砲水雷船艇均爲向所未有一切支款並無例章可循卽威遠兵輪閩廠雖有支款數目而既調津改作練船又與兵輪有異必須因事制宜亦不能盡照閩章支發凡各船到津後皆由臣察看船隻之大小

噸載之輕重機器礮位桅帆器械之繁簡酌擬人數餉數又以造端不易復與統領水師及教習洋員再三參酌分別損益務使利器可得實用經費不致浮糜現定各船支款章程雖規模未臻完備然皆稱事授精力求核實樽節嗣後如有變通增減之處再隨時酌核妥辦並咨部立案除將詳細清單咨送兵部外謹開各船支款簡明清單敬呈

御覽伏乞

皇太后

皇上聖鑒敕部知照謹

奏

謹將北洋海防經費項下開支現有各輪船薪糧公費數目
繕具簡明清單恭呈

御覽

超勇快碰船每月支薪糧公費銀二千八百二十二兩

揚威快碰船每月支薪糧公費銀二千六百七十二兩

鎮北蚊礮船每月支薪糧公費銀九百七十八兩

鎮南蚊礮船每月支薪糧公費銀九百六十八兩

鎮東蚊礮船每月支薪糧公費銀九百七十八兩

鎮西蚊礮船每月支薪糧公費銀九百六十八兩

鎮中蚊礮船每月支薪糧公費銀九百七十八兩

鎮邊蚊礮船每月支薪糧公費銀九百六十八兩

威遠練船每月支薪糧公費銀一千九百九兩

康濟練船每月支薪糧公費銀二千五十九兩

海鏡商輪船每月支薪糧公費銀一千二百四十六兩

快馬小輪船每月支薪糧公費銀三百八十二兩

利順小輪船每月支薪糧公費銀二百七十一兩九錢

水雷小艇每月支薪糧公費銀八十六兩

守甯下雷小輪船二隻每月共支薪糧公費銀四百十八兩

請撥南漕濟賑摺 光緒十年正月二十九日

奏為順直窪區積水未消民情困苦懇

恩賞撥南漕以濟春賑恭摺仰祈

聖鑒事竊順直各屬上年伏秋大水計被災歉者一百零九州縣仰蒙

恩旨蠲緩糧租疊次

賞撥銀米並由臣等設法籌款辦理冬賑均經奏報在案茲查高
地雖已涸復種麥窪區積水仍未盡消小民既乏蓋藏又無麥收
可指嗷嗷待哺困苦益深此後為日方長必須妥為撫綏俾免委
填溝壑據順屬災重之通州等十餘州縣直屬災重之天津等二
十餘州縣紛紛請撥銀米賑撫並擇要開濬河道修補隄工疏消
積水使少壯者備趁餬口以工代撫現已派員分投查辦但災區

既廣戶口極繁工程亦多業經督同司道在藩運關各庫竭力搜羅並將各省捐款湊用而核計所短尙巨直隸向係缺額豐年且有不敷況值大禳之餘疊次湊撥賑款現實無可再撥順天更形艱窘民命關係至重不得不作發棠之請臣於年前豫籌春賑摺內已聲明屆時奏乞

恩施茲查蘇浙本屆新漕開兌較早指日運津順直近隸

皇綏夙蒙

加惠飢民謀生乏術望

澤尤殷合無籲懇

天恩賞撥江蘇浙江漕米各五萬石共十萬石卽就招商局輪船運津之米就近截撥責成天津道裕長會同籌賑局驗收順直酌量分用由臣等督飭各屬詳察災區輕重及時勻撥遴委委員會

同地方官確查戶口核實散放並分別以工代撫務使實惠及民
不准絲毫弊混其隨漕輕燬等項及剝價銀兩經到耗食米石並
折案飭由各該糧道核數提扣解直津貼運費本屆蘇浙起運漕
糧較上屆之數增多今請截撥十萬石於京倉似無所損而順直
災黎藉資接濟所全實多如蒙

俯允所請仰祈

明諭宣示益足固民志而廣

皇仁理合會同兼管順天府府尹臣畢道遠順天府府尹臣周家

相恭摺由驛陳請是否有當伏乞

皇太后

皇上聖鑒訓示施行謹

奏

覆奏黃河口門用機船片

光緒十年正月二十九日

再欽奉光緒九年十二月二十二日

寄諭御史趙爾巽奏酌擬山東河工辦法各摺片所請飭撥機船開挖口門是否可行著李鴻章左宗棠陳士杰酌議具奏等因欽此伏查北洋前山德國訂購挖海大機器船一隻取名導海廠價運費約需銀十四萬兩長二十一丈寬四丈其運動輪機有四百匹馬力可挖深至三丈六尺專為疏濬旅順口而設現據李鳳苞電報甫由西洋開駛尙未到華旅順係非洋水師口岸重地必須將口門及東西兩澳開挖深廣使兵船便於駐泊庶海上巡防之水師方有歸宿約計工程非一二年所能告成勢難撥赴山東試挖黃河致誤海防要工且此船係在清水挖用於黃流渾濁不宜轉致損傷機器大抵治河之法築隄束水攻沙與用機船濬通海

口可以並行不悖聞泰西月有挖濁河之機器船東省是否合用
應否向西洋訂購應由撫臣訪查酌辦至泰安兵船因提督吳長
慶駐軍朝鮮並威海旅順各口工作正繁前已派令該船往來接
遞文報轉運軍需如吳淞口機船能到東試挖或須接濟煤米
再察看海防緩急暫時酌派往助但由海外運煤非南購於煙臺
卽北購於開平勞費頗多仍不若以東省內地煤米用民船順流
而下剝運接濟較爲省便除咨山東撫臣查照外理合附片覆陳
伏乞

聖鑒謹
奏

議擬吳大澂赴粵摺

光緒十年二月初四日

奏為遵

旨酌度情形妥籌糧陳仰祈

聖鑒事竊臣承准軍機大臣密寄正月二十九日奉

上諭吳大澂奏滇桂邊防緊要請准率所部前往廣西會同籌辦一摺該京卿所部各營原擬駐紮欒樂一帶如調赴廣西該處沿海各地方應派何軍填紮直隸防營是否足資分布著李鴻章酌度情形妥籌具奏等因欽此遵查直隸沿海地方寬闊切近

京畿籌防必須嚴密臣所部淮軍留防直境者一萬五千餘人專力注重天津及大沽北塘蘆臺一帶間以本省練軍設有警急尙可自為援應至由通州至山海關六百餘里為京東大道距津稍遠永平一屬處處濱海空虛無兵僅山海關之甯海城有總兵葉

志超所統正定練軍馬步四營頻年修築礮臺工甫就繕人數太單孤懸可慮查六年防俄之役鮑超以萬餘人分紮灤樂曾國荃以萬人督防榆關聲勢聯絡蓋近畿重地必須有重兵相爲掎角以備不虞去冬臣正籌議閒適吳大澂奉

命來津卽與商定該軍四千餘人俟春融移紮灤州樂亭昌黎等處專防東路若有戰事臣再由津派隊馳往援擊當可無誤事機臣與吳大澂各有

奏報在案茲該京卿以後膽鎗礮練習已精奏請率師赴粵出關臣向同籌辦誠如

聖諭奮勇可嘉惟直隸爲

畿輔根本之地兵力本不甚厚卽添吳大澂一軍亦未敢謂周密無閒萬無一失但彼所部皆係淮勇與臣軍氣誼易投必能同心

戮力捍禦門戶儻

聖意權衡輕重必欲調赴廣西則全局所關自難以京東一隅之防致阻其一往無前之氣查有前甘肅提督曹克忠新募津勝六營月內計可成軍前擬令赴煙臺該處現經山東撫臣陳士杰親往布置完備似可酌量移調應飭其拔赴昌黎樂亭一路擇要扼紮認真訓練以備緩急該軍僅三千人力量頗單容再相度敵情隨時察酌機宜月籌添調俾資援助斯於萬不得已之中勉求兼顧兩全之策是否有當仍候

聖明裁斷施行再奉

諭旨垂詢該軍准勇吉林旗丁於蠻煙瘴雨之鄉是否相宜不可不慮等因據吳大澂函稱該部吉林旗丁民勇不過五十餘人如果赴粵可准其告假資遣回東淮部將士皆願從征不敢畏避煙

瘴等因想必體察下情分別辦理所有遊
旨酌度籌辦緣由謹繕摺由驛密陳伏乞

皇太后

皇上聖鑒訓示謹

奏

變通朝鮮貿易章程摺

光緒十年二月十六日

奏爲中國朝鮮商民貿易章程第四條現應變通酌改庶與英德各約不致軒輊恭摺仰祈

聖鑒事竊查光緒八年奏定中國朝鮮商民貿易章程第四條內載朝鮮商民除在北京例准交易中國商民准入朝鮮楊花津漢城開設行棧外不准將各色貨物運入內地坐肆售賣等語原因朝鮮風氣未開若華洋各商運貨入彼內地恐生疑阻乃上年十月開朝鮮與英德續訂條約載明英德商民准將各貨運進內地出售及購置一切土貨是彼已無疑阻之心若中國商民轉不得運往朝鮮內地既與體制未符亦於商情未協且中國礙待屬邦若朝鮮商民前來中國內地賣貨亦應視同華民均霑利益經臣督飭津海關道周馥悉心酌核擬請嗣後中國商民准其持照將

中國貨洋貨運入朝鮮內地售賣不得有遜於英德諸商其朝鮮商民亦准持照將朝鮮貨洋貨運入中國內地售賣照華商達關納稅遇卡抽釐近年華商運洋貨入內地有不願達關納稅遇卡抽釐而願先完一子口半稅者業已准行儻朝鮮商民願領洋貨入內地稅單冀免內地釐稅者亦聽其便以示優待一體之意其請領執照各按已定章程辦理未領執照不准擅入內地仍禁止兩國商民不准在內地開設行棧坐肆售賣以示限制至兩國商民欲入內地采買土貨仍按原定通商章程照納沿途應完釐稅毋庸議改如此辦理與待華商無分輕重於體恤屬邦之道更加周至而於體制名分亦相符合查原議中國朝鮮商民貿易章程內開此次所定貿易章程姑從簡約以後有須增損之處應隨時由北洋大臣與朝鮮國王咨商妥善請

旨定奪施行等語臣卽據詳咨商朝鮮國王去後茲准該國王覆稱中國商民將貨運進朝鮮內地出售允合事宜朝鮮商民前來中國內地改貨中國視同華民一律同霽利益賣出

天朝體恤屬邦無分內外之盛意極庸感激請轉

奏定奪等因前來除咨會總理衙門並咨行各省關一體查照外謹錄該國王覆文恭摺具陳伏乞

皇太后

皇上聖鑒訓示謹

奏

謹將酌改中國朝鮮商民貿易章程第四條朝鮮國王覆文
照錄恭呈

御覽

朝鮮國王爲咨覆事承准貴署大臣咨開上年朝鮮與英國德國
原議條約只准運貨進出海口不准運入內地故前議中國朝鮮
水陸貿易章程於第四條內載明朝鮮商民除在北京例准交易
與中國商民准入朝鮮楊花津漢城開設行棧外不准將各色貨
物運入內地坐肆售賣等語原因朝鮮風氣未開若准華商運貨
入彼內地英德諸國將必援引續請徒使朝鮮多生疑阻現在朝
鮮新與英德續議條約既載明英德商民准其將貨運進內地出
售而中國商民轉不得運往朝鮮內地既與體制未符亦於商情
未協此條自應變通酌量更改且中國優待屬邦朝鮮商民前來

中國內地賣貨者中國亦應視同華民一律同霑利益擬請嗣後中國商民准其持照將中國貨洋貨運入朝鮮內地售賣不得有遜於英德諸商其朝鮮商民亦准持照將朝鮮貨洋貨運入中國內地售賣照華商逢關納稅遇卡抽釐而願先完一子口半稅者業已准行有不願逢關納稅遇卡抽釐而願先完一子口半稅者業已准行儻朝鮮商民願領洋貨入內地稅單蠲免內地釐稅者亦聽其便以示優待一體之意其請領執照各按已定章程辦理未領執照不准擅入內地仍禁止兩國商民不准在不通商之內地開設行棧坐肆售賣以示限制至兩國商民欲入內地采買土貨仍按上年原定通商章程照納沿途應完釐稅毋庸議改如此辦理與待華商無分輕重於體恤屬邦之道更加周至而於體制名分亦相符合將酌議更改緣由咨商查核辦理見覆施行等因奉此

經發付督辦交涉通商事務閔泳穆等覆議茲據閔泳穆等啟稱
竊伏奉傳下北洋大臣咨商一本謹行查閱所有嗣後中國商民
准其持照將中國貨洋貨運入朝鮮內地售賣朝鮮商民亦准持
照將朝鮮貨洋貨運入中國內地售賣照華商逢關納稅遇卡抽
釐近年華商運洋貨入內地有不願逢關納稅遇卡抽釐而願先
完一子口半稅者業已准行儻朝鮮商民願領洋貨入內地稅單
冀免內地釐稅者亦聽其便一節查前年

奏定中國朝鮮水陸貿易章程第四條內載不准將各色貨物運
入內地坐肆售賣等語業經遵行而現在英德新約既載明英德
商民准其將貨運進內地出售則中國商民自應准其將貨運進
朝鮮內地出售以符體制而協商情如此變通酌改允合事宜至
朝鮮商民前來中國內地賣貨者中國視同華民一律同霑利益

之處竄出

天朝體恤屬邦無分內外之盛意益加周摯極庸感激合將章程酌改案件一體恪遵辦理具由覆啟等情據此核閱無異相應咨覆貴署大臣請煩轉

奏定奪施行須至咨覆者

光緒十年正月二十六日發二月初九日接到

查覆淳沱南岸情形片

光緒十年二月十六日

再臣欽奉光緒九年十二月初三日

寄諭都察院奏直隸民人耿學卜等呈控攔河築壩傷斃多命一摺卽著嚴行查辦據實具奏等因欽此遵查此案係獻縣淳沱河南岸大章等村民於上年八月初糾集數百人鳴鑼吹角執持鎗礮駕駛多船擁至北岸扒掘官隄一面施放鎗礮拒敵北岸守隄之民力不能禦促令礮船駛往馳救始則好言勸阻繼以空礮恐嚇皆置不顧其時隄之存亡與下游九州縣田廬民命危在呼吸不得已開礮抵格始行解散閒有落水傷斃者當經臣查明辦結將案情始末實在情形詳細具奏奉

旨知道了欽此欽遵在案旋奉

寄諭後又派道員金福曾前往詳切覆查實係南岸村民糾眾扒

隄施放鎗礮拒敵被格曾奪獲火鎗刀械多件供證確鑿該府縣稟報卷據皆同與訪查情節悉相符合耿學卜等原呈所稱逃難過河被北岸妄稟致傷各節均係事後捏控飾詞逞刁毫無影響至原任河閒府知府陳崇砥於河閒八里橋一帶所開引河本欲引滹水由古羊河入子牙但形勢不順非惟無益反受子牙倒漾之患曾經臣派員勘度於光緒七年在獻縣朱家口另開新河滹水復了牙故道下游九州縣受益甚廣其北岸河頭因古羊斷流是以築壩使水趨歸新河乃河工一定辦法該縣南岸四十餘村本居窪下適傍滹沱上流久被漲漫固由地勢使然而被災情形甚屬可憫未忍膜視業飭金福曾與清河道史克寬詳細察勘妥籌疏治擬於北岸建滾水壩盛漲時減水三分北走古羊冀於下游大局無礙並補築南隄缺口及滄陽河隄移建雙村崗座凡此

皆於無可設法之中思爲南岸竭力補救庶得稍輕水患已飭籌
款照辦現在窪地積水次第涸消尙可補種春麥仍妥爲撫綏分
別平糶散賑藉工代撫以舒積困於萬一合再據實覆陳伏乞
聖鑒謹

奏

學生王慶端請卹片

光緒十年二月十六日

再准出使德國大臣李鳳苞咨呈稱出洋學生王慶端於光緒九年十一月二十九日在法國巴黎寓次病故飭派隨員參將陳季同前往看視詢據同寓學生魏進等聲稱王慶端在橋路學堂肄業夏閒放假三箇月游歷法國各境詳覽船塢工程海濱低溼天時寒暖不常病源卽由此起回至巴黎趕繕游歷日記復與官學諸生競力功課繪算圖說嘗至夜分不睡前七八日左臂疼痛欲折飲食漸減經洋監督日意格爲租醫館調治病勢日重臂腫益劇遂至不起查醫案云該生徧體發燒神情恍惚時作怔忡煩躁之態係屬用心過度難以施診除棺殮交法公司船運送回閩外查王慶端係閩廠前堂學生經前船政大臣沈葆楨考取入堂勤勉聰穎於數學機器法文繪算精通光緒七年續派出洋入塘塢

橋路官學潛心肄習竟可與洋生同試取列高等該官學師儒贊美同聲今因攻苦病歿親老子幼尤堪憫惻咨請照案奏卹前來臣查光緒二年奏定選派船政生徒出洋肄業章程內開各生因攻苦積勞致有不測之事酌量附奏優卹等因今王慶端選派出洋數年學業已有成效乃以勤苦致疾殞命外洋殊為可惜相應據情奏懇

天恩俯准敕部從優議卹以慰喬魂而勸來學謹會同船政大臣詹事府少詹事臣何如璋附片陳請伏乞

聖鑒訓示謹

奏

北運河工程捐

光緒十年三月初二日

奏爲通州張家灣運東之北運河新衝河道現擬撥款挑挖通暢
並將舊河頭堵塞以利漕運恭摺仰祈

聖鑒事竊通州張家灣運東之北運河上年伏秋大汛自蘇莊至
姚辛莊衝開新河一段溜勢頗暢舊河已形淤墊臣等以事關漕
運應否徑由新河行走抑仍疏濬舊河疊飭漕運道判通州知州
查勘並令通永道薛福辰督飭各員勘估籌議茲據該道薛福辰
詳稱舊河自上口至下口長六千四百餘丈形勢迂曲大半淤墊
業已斷流若欲挽復工大費鉅應毋庸議新河自上口至下口長
七百二十四丈兩頭均與舊河相接形勢順直舟行便利全河大
溜均循新河而下惟河身係自行衝開河底不能一律深道寬自
二十餘丈至十丈不等深自丈餘至二三尺不等察看河面毋庸

展寬河底深至四尺以上者亦毋庸開深其僅止二三尺者計有
 三百丈行船尚須剝淺亟應設法挑挖但溜勢甚急施工不易若
 築壩阻溜使水暫行舊河以資工作核計需費不少現擬製造新
 式鐵口刮泥大板用牛騾之力在兩岸拖拉並招募熟悉水工大
 欽土夫同力合作令其一律通暢約需工費庫平實銀二千二百
 兩係屬竭力撙節至舊河頭不堵恐盛漲分流河形又有遷徙應
 堅築攔水壩兩道及挑平新河頭土阜一座並聲明新河所佔民
 地應以舊河身淤出地畝相抵等情詳請核示前來臣等查所擬
 辦法均合機宜應卽照辦除舊河築壩工費由直賑項下籌撥外
 其挑挖新河工費銀二千二百兩事關漕運擬請由倉場衙門庫
 存輕齎銀內照數籌撥此項水工係以牛騾之力駕板拖拉非尋
 常估計土方可比請免照例造冊報銷以昭核實現在蘇浙漕糧

陸續到津亟須轉運赴通工程緊要須於三月十五日前後辦竣
方免誤運俟奉

旨後卽行發款飭由通永道薛福辰督同委員核實趕辦

臣等與

臣錫珍游百川往返咨商意見相同咀合會同倉場侍郎

臣錫

珍游百川兼管順天府府尹

臣畢道遠順天府府尹

臣周家相

恭摺由驛具陳伏乞

皇太后

皇上聖鑒訓示謹

奏

酌保邊材籌濟軍火摺

光緒十年三月十七日

奏為

旨酌保邊材並籌濟軍火恭摺密陳仰祈

聖鑒事竊臣欽奉三月十二日

寄諭前有旨令潘鼎新署理廣西巡撫剋日馳往接統徐延旭所部各營邊事正殷需才孔亟潘鼎新到粵後必須有人相助為理著李鴻章於各將領中擇其堪勝邊疆提鎮之任者據實保奏一二員聽候簡用粵軍所用軍火等項極關緊要並著設法接濟毋任缺乏等因欽此仰見

朝廷遴選將材蒐討軍實至意欽服莫名查潘鼎新前統淮軍歷

勦粵捻各匪戰功夙著茲蒙

恩移營桂撫接統徐延旭所部自能相機妥慎籌辦惟其舊部鼎

營道撤已久由湘赴粵恐乏宿將隨往邊軍潰敗之餘整頓不易
諭旨詢及須有人相助爲理洵屬切要之圖現值海防喫緊各處
統軍得力之員礙難更動臣占臣日所知者量加選擇查有遇
缺題奏提督現署直隸通永鎮總兵唐仁廉湖南東安縣人前隸
鮑超部下著名驍勇嗣隨臣勦辦東西各捻上年丁憂經臣奏留
督鎮督防北塘海口馭軍有方英鸞善戰又記名提督現任貴州
安義鎮總兵周壽昌安徽桐城縣人隨勦多年屢經大敵訓練精
明戰守可靠前已臧商潘鼎新酌量奏調該二員年力正強熟諳
戎機似均堪勝邊疆提鎮之任且與潘鼎新曾共征役氣誼投洽
操用洋械亦知講求謹據實臚陳伏候
聖明采擇至粵軍所用軍火本少精利之品前敵疊經挫退遺失
必多亟須酌籌接濟臣上年夏間在滬曾撥給潘鼎新毛瑟後膛

鎗一千桿該撫計當隨帶入粵又去冬奏撥滇桂各軍甯局仿造
兩磅過山礮十尊林明敦後膛鎗一千桿士乃得後膛鎗二千桿
配齊子彈各項於今春二月開凍後分批航海解粵適准總理衙
門函屬酌濟潘鼎新所需軍火因電商兩廣督臣張樹聲全數截
留梧州轉運局就候提用並咨明潘鼎新知照可備目前急需俟
臣續購大批後膛鎗礮六七月間到滬容再遵
旨設法撥濟勿任缺乏理合繕摺由驛覆陳伏乞

皇太后

皇上聖鑒謹

奏

擬奏周盛傳參款片

光緒十年四月初四日

再臣欽奉三月二十五日

咨諭有人奏風聞現在天津統帶淮軍之湖南提督周盛傳盤剝兵丁異常刻苦該提督行爲跋扈李鴻章受其挾制等語天津屏蔽京師關係甚重周盛傳統帶防軍是否得力所參各節有無其事著李鴻章悉心察看據實具奏原片著鈔給閱看等因欽此伏查湖南提督周盛傳於咸豐年間在廬州西鄉團練鄉勇屢擊敗粵捻大股以能戰名同治元年臣飭募盛字營赴上海協剿蘇常髮逆嗣復調勦東豫鄂皖直五省捻匪以次蕩平隨由陝西移直布置海防歷年築新城造礮臺濬河屯田工作之暇操練各種後膛鎗礮精益求精盛軍利器足與西洋相埒實爲各省防軍之冠

臣等經

奏明有案通政使司通政使吳大澂去冬近駐新城知之最悉本年正月開奏稱就中國統兵大員而論熟知外洋軍火得失惟周盛傳爲最所統盛軍爲臣部最得力之師非虛語也原片稱盤剝兵丁異常刻苦營中食用之物皆設有鋪店擡價壓銷在白糧下坐扣致各兵貧乏不堪等語查淮軍定章各營食米向由統領派員赴南省購運俾臨敵行軍不至乏食仍連價腳核計扣銀不准絲毫多扣此外一切用物皆由弁勇自購該提督並無設有鋪店擡價壓銷之事至勇丁貧乏因各省協餉不能解足每年常欠給二三關此由臣籌餉無方非周盛傳片有剋減然軍士相從年久尙無怨懟也原片又稱該提督行爲跋扈臣懼激則生變事事受其挾制等語尤屬不經之談周盛傳自束髮從戎隨臣周旋忠難將三十年親若弟昆絕無違悖教令情事該提督日孜孜以練兵

簡器效操爲事謹守禮法彼固無所謂跋扈臣亦何容其挾制該
提督感受

天恩寄以專闔每思慷慨一戰得當以報更何至有事內訌自蹈
大戾原片又稱整頓淮軍非劉銘傳不能得力臣已欽遵二十六

日

諭旨飛檄劉銘傳剋期應

召赴京銷假劉銘傳才氣開展周盛傳器局謹嚴各有所長均爲
淮部所推服似亦無甚軒輊也理合據實詳細覆陳伏乞

聖鑒謹

奏

議分慶軍駐朝片

光緒十年四月初四日

再欽奉光緒十年三月二十六日

寄諭通政使參議延茂奏請飭調吳長慶一軍移紮金州等語吳長慶統率所部駐紮朝鮮應否將該軍調回擇要扼守著李鴻章體察情形奏明辦理等因欽此竊臣於八年十月九年九月疊經奏明吳長慶現駐朝鮮六營擬隨時酌度機宜分別撤留在案今春吳長慶自朝鮮來津商詢一切據稱該國與英美德各邦立約後商務可興民心漸定若暫留三營保護彈壓當無他虞正與臣籌議抽撤之法欽奉前因法國兵船向北開駛與臣處所接閩滬電報相同北洋地廣兵單防務喫緊亟須添調策應自應先其所急令吳長慶統率所部親兵前營中營正營撤回內渡由臣相機察度何處緊要卽飭前往扼守仍留親兵左營後營慶副營暫駐

朝鮮王城以資兼顧查有記名提督吳兆有樸實勤練紀律嚴明
隨同吳長慶在朝鮮帶兵兩年威惠兼著軍民翕服堪以委令統
帶駐朝二營俾專責成分發同知袁世凱廉明果毅曉暢機宜久
辦慶軍營務兼帶朝鮮練軍該國君臣均深敬佩堪以委令總理
營務處會辦朝鮮防務可期得力惟軍士遠戍海外艱苦異常殊
非經久之策容臣隨時察訪如朝鮮練軍稍齊可自鎮撫卽將暫
留三營撤回歸隊以後再派兵船輪替前往巡駐海口藉以護商
防患庶爲活著遠謀所有體察情形分別辦理緣由附片覆陳是
否有當伏乞

聖鑒訓示謹

奏

議馬頰河不宜開摺

光緒十年四月十六日

奏爲開馬頰河分減黃流地勢未宜民情不順工費無出後患難防據實覆陳仰祈

聖鑒事竊臣前准工部咨開會同戶部議覆侍郎游百川奏請開馬頰河分減黃流一摺又議覆御史吳响奏不宜開河分減一摺應令直隸山東派員勘驗通盤籌議折衷一是等因奏奉

旨依議欽此欽遵知照前來當經遴派熟悉河工之候補知府吳士湘隨帶素精儀器員弁馳抵海豐縣沙河海口溯流而上將馬頰全河里數寬深丈尺工程難易及直東地勢高下民情順逆逐細測量體察計歷山東海豐直隸慶雲山東樂陵德平德州平原恩縣高唐禹城齊河長清十一州縣至長清縣屬黃河北岸五龍潭原擬建壩處所迨勘畢後又以津海關道周馥前會委勘東

境黃河上下游請悉情形飭吳士湘悉心妥議茲據該道府繪圖貼說分晰稟覆並先准山東撫臣陳士杰派員往勘緘請會奏等因查據吳士湘稟稱五龍潭至平原縣之鍋培口馬頰河頭計長三萬四千三百四十丈合一百九十里其間紆迴曲折須穿過徒駭等河九道惟潔滄兩河尙有河槽寬而不深若徒駭巴公范公趙王趙牛正岔等河寬祇二三丈深祇六七尺其無河處所須生開陸地六千二百二十丈又自鍋培口入馬頰河至海豐縣沙土河海口卽馬頰尾閘計長七萬四千三百七十五丈合四百十三里其在德州平原境內者口寬七八十丈深丈許在德平樂陵慶雲海豐境內者口寬不過十丈八丈深僅數丈全河併計狹淺處約有十分之七總計自五龍潭迄沙土河海口共長十萬八千七百十五丈合六百三里照游百川原奏挑寬四十丈深一丈其

兩岸堆土及留河灘至少須有六十丈合其佔地寬一百丈計長
清縣境佔地一萬六千四百餘畝墳墓二千八百餘塚又四十七
村合三千四百三十餘戶齊河縣境佔地六千七百餘畝墳墓一
千二百餘塚又二十五村合一千餘戶禹城縣境佔地九千五百
餘畝墳墓三千八百四十餘塚又五十九村合四千一百餘戶平
原縣境佔地七千九百餘畝墳墓四千九百餘塚又七十村合五
千一百餘戶德州境墳墓五千一百七十餘塚又九十四村合七
千七百餘戶德平縣境佔地一萬四千餘畝墳墓四千六百八十
餘塚又九十八村合五千九百二十餘戶樂陵縣境佔地七千五
百餘畝墳墓四千四十餘塚又八十四村合四千五百五十餘戶
慶雲縣境佔地七千五百餘畝墳墓二千三百餘塚又五十村合
三千四百五十戶海豐縣境佔地與荒廢斥鹵相間礙難細核約

計一萬畝墳墓二千八百餘塚又四十九村合四千四百三十餘戶統計佔地七萬九千餘畝除原舊河形外實佔現在民田六萬餘畝又五百七十六村共三萬九千六百餘戶又墳墓三萬一千七百餘塚此五龍潭至馬頰河尾間若擬開引須佔用民業之實在數目也又查五龍潭本係百年不易之險自銅瓦廂決口黃流會入大清河東趨迎溜兜灣其險更甚常有漫潰上年凌汛續決三百餘丈測量該處黃河口寬一百二十丈南岸雜蒿老灘頂入河心偪溜北衝北岸水深二丈南岸水深六尺北岸地平又較低南岸地平七尺二寸土人云上年秋汛水漲高於平地二尺如游百川原奏建滾水壩北岸低二三尺是汛漲過水當在一丈上下又測量平原縣鍋培口地平較五龍潭低一丈五尺五寸海豐沙土河海口地平較鍋培口又低十二丈八尺六寸可見愈北愈低

而天津三岔河口地平較慶雲之馬頰河北岸又低九丈五尺四寸又查馬頰河北距南運河遠者百餘里近者如恩縣德州兩處相去僅四五十里此五龍潭黃河大溜緊逼北岸連北地勢節節低下而馬頰又有切近南運河處所之實在情形也臣督飭周馥吳士湘通盤籌議不可開引黃流入馬頰者約有七端黃河自古少開壩分水之案漢之瓠子酸棗宋之六塔二股明之沙灣皆因分水貽害後皆引以爲鑒我

朝河臣靳輔建毛城鋪太谷山龍虎山天然減水開壩皆就山骨堅土之處建立壩基下有湖蕩可歸且挑倒鉤引河以防奪溜乃不久仍多廢棄以後無敢踵而行之者今五龍潭爲極險之衝一片純沙壩基難立若欲改河非行貽害甚廣禦之不暇奈何引之此不可者一減河所經橫穿徒駭巴公趙王等河九道紆折一百

九十里勢必將此九河東去之路盡行堵塞挽使北趨竊恐天生
 地脈非可以人力亂之汎漲湧至依舊衝決此不可者二黃入濟
 漕以來兩岸居民久困沈災識者謂因城鎮太多未能早築遙隄
 之故今分黃入馬頰斜行六百三里卽新增兩岸隄工一千二百
 餘里官守民守均苦無力是使六百三面向不被水之區皆無完
 土此不可者三黃流下游淤淺實因上游分溢過多正河水少之
 故若以徒駭馬頰一再分減而視攔水之遙隄爲緩圖則下游必
 更停淤下壘上潰恐長清以上益多漫溢此不可者四六百三里
 之中除舊河墾種不計外新佔民田六萬餘畝小民已苦失業且
 有五百七十六村三萬九千餘戶又墳墓三萬一千七百餘塚從
 何遷徙此不可者五自來渾河不能兩行東漢以後議論紛紜辦
 法不一大抵合則偶治分則必壞往籍班班可考禹河雖暫分行

但今昔時異勢殊未可泥古現勘濟北地勢節節低下上性鬆浮天津又低於慶雲馬頰非岸九丈數尺而上游德州恩縣之馬頰距南運河祇四五十里黃河善徒往往橫侵驟決設使開引之後就下勢順改道非趨川以直境永定萍沱潮白漳衛拒馬三易五大河之水將見畿南全成澤國事所必至理有固然

京畿根本重地極宜慎重此不可者六五龍潭以下至入馬頰除原舊河形不挑外照原奏丈尺核計土方應挑八百八十五萬餘方又開馬頰各段並培補兩岸殘隄應挑土一千一百三十九萬餘方按山東原估每方銀一錢五分共需銀三百餘萬兩而建撥水壩之費尙不知凡幾遷徙村戶墳墓並給地價一切更無從預估其原估築隄項下焉能節出如許經費開辦此河當茲時事艱難重耗鉅款興此無益有害之工殊屬非計此不可者七自開引

之說起直東沿河州縣紳民或在臣處或於委員經過時紛紛遞呈籲求免辦情詞迫切地勢既不相宜民情又復不順工費無出後患難防竇以不開爲便至游百川原奏開杜家溝分水入徒駭一節已經山東撫臣奏明秋後察看又御史吳响條奏亟築縷隄並築遙隄創築圍隄任民修守覈免錢漕兼籌帑項勘定海口取直河身考覈舊河歷練賢才各節似多可行惟節目甚繁非一時所能措辦亦非直隸所能遙度如何次第舉行期於河防大局有神應由山東撫臣隨時察酌妥籌分別奏辦除將吳士湘繪送圖說分咨軍機處工部查核外所有馬頰河不宜開挖分減黃流緣由理合會同山東撫臣陳士杰恭摺據實覆陳伏乞

皇太后

皇上聖鑒訓示謹

於

議濟宣惠河捐

光緒十年四月十六日

奏爲查勘山東恩縣德州南運減河直隸宣惠河淤塞情形現擬籌款將宣惠河挑濬恭摺陳仰祈

聖鑒事竊臣欽奉光緒九年十二月十五日

寄諭御史劉恩溥奏畿南州縣連年被水請飭將山東恩縣境內之四女寺及德州境內之哨馬營兩處減河壚口修濬並於兩減河下流挑挖疏通更令宣惠河上接德州哨馬營減河其下游直隸東光南皮滄州等處一律疏通庶運河水有分消不至潰決至開濬宣惠河祇須於近河隄旁官地向南挑挖勿任阻撓等語山東德州一帶毗連直境該處河隄各工於畿輔民生利害殊有關係著體察情形詳細酌度妥議具奏等因欽此當飭候補知府吳士湘於勘竣馬頰河後卽赴山東恩縣德州及直隸吳橋一帶逐

細勘查並令天津道裕長督飭各地方官體察情形與吳士湘通籌妥議一面咨會山東撫臣一體派員勘議茲據該道府繪圖貼說分晰稟覆前來臣查吳士湘稟稱德州哨馬營南運減河係明尚書宋禮所開我

朝雍正乾隆年間兩經大修現在壩口已坍塌淤塞僅存石片數十塊縱橫水中不能細加測量壩上淤土堆如山岸高於水面二丈壩下減河在德州境內者十八里久成平陸下入直隸吳橋縣境即接鉤盤河現尚深二三尺至玉泉莊與四女寺減河合流匯入南運河計在吳橋縣境者三十六里總合五十四里從開口至玉泉莊淤墊太甚幾至不復辨識民間侵種已久此時疏通無異新闢又恩縣四女寺南運減河壩在哨馬營上游三十餘里係明都御史白昂所開我

朝康熙雍正乾隆年間屢經修濬厥後漸廢該壩海墘金牆雁翅
多被淤塞但較哨馬營減水壩稍有規模海墘長約十丈壩口寬
約二十餘丈壩上石橋十孔已淤其七土人云南運盛漲時尙可
過水尺餘壩下減河亦至吳橋縣玉泉莊匯入南運故瀆計長九
十三里下經甯津南皮樂陵慶雲鹽山入海豐縣境至古大沽口
歸海又長三百一里共合三百九十四里俱有河形可就寬三四
丈至七八丈深一二三四尺查南運舊減河有四在東境者四女
寺哨馬營兩處在直境者滄州捷地青縣興濟兩處並前因直境
舊減河早經淤塞力難開挖遂於靜海斬官屯新開減河一道下
就淮軍所開營田之河達海藉省工費惟分洩尤重上游上游漲
減則下游全工受益四女寺爲各減河之首南運非黃河易淤者
可比分減不患過多下有河身可歸另途出海地勢民情亦無不

順誠能將四女寺減河修濬實爲治南運釜底抽薪之計哨馬營減河淤墊既甚侵種又久若欲併闢爲費太重實難並舉咨商山東撫臣陳士杰派員勘估擇要籌辦惟減河下游直境應挑工段甚長需費甚巨屆時擬照劉恩溥原奏另請部款再行核酌具奏至直境宣惠河溯查乾隆五年開挖其河頭在吳橋縣境李尙學莊同治十一年挑濬自李尙學莊迤上王指揮莊起專以消洩附近窪水向無來源若改接哨馬營減河不惟王指揮莊河頭與運河向隔三四十里隄旁官地未能相就且中隔沙河一道礙難穿斷宣惠又高於沙河八尺九寸亦難由此引入此等無源之河澇則汪洋每苦宣洩不及旱則乾涸並無灌溉可資備上接哨馬營減河添借來源民情不願自應各循其舊查宣惠河自吳橋王指揮莊經東光至南皮劉蛤蟆莊長一百十餘里其下則分兩支

北支山王莽河過蔡家窪達滄州石碑河至大浪泊與捷地減河
會入牧豬港歸邢口出海計長一百五十六里南支由劉蛤蟆莊
范家隄穿金沙嶺過鹽山燕子窪入山東海豐縣境會南津至古
大沽口出海計長二百三十四里現勘北支自劉蛤蟆莊以下閒
有河形不過十分之一自蔡家窪以下卽石碑河口寬三四五丈
至七八九丈深二三尺至四五尺其自大浪泊至牧豬港約四十
餘里皆窪泊積水寬深尙難勘丈至南支河口寬四五丈至六七
丈深二三四尺至一丈兩隄高四五尺七八尺岸上廢土山積僅
有河槽一條絕少窪蕩兩支比較北支隄河雖不及南支寬深而
地勢低平多穿窪泊南支隄河雖較完整而地勢稍仰且穿金沙
嶺高亢之地七十餘里同治十一年以滄民不願此河北行前州
牧項桂輪徇其所請專濟南支惟金沙嶺地勢旣高淤沙厚積水

難暢下一有衝決北支蔡家窪一帶同被淹澇上年德州運河決口漫水淹至東光境內宣惠河爲隄所阻東光滄州南皮之民掘隄互鬪致傷多命實堪憫惻臣前已飭地方印委勘籌辦法查乾隆五年前督臣孫嘉淦開宣惠河本走北支嗣因下游石碑水多不能並納經前督臣方觀承分挑南支今應規復北支以順就下之勢但慮金沙嶺南支益形淤塞勢將全溜掣入北支則石碑不能容納滄境從此氾濫永無甯歲既無以服滄民之心亦失前賢分疏之意是南支亦不宜廢也擬於上年宣惠北岸坊子莊決口之處就水衝溝槽數里循北支舊河故跡疏濬寬約五丈兩邊築隄卽在北隄建一滾水灰壩寬以七丈爲度高以南岸河口爲憑水漲時任由壩上滾出不過減水三四分並將石碑河下游一律相勢挑濬加築隄埝使水有所歸不致出槽爲患而南支金沙嶺

原有河槽亦卽酌量疏濬水小之年仍由南支行走水大則分減入北支在滄民無虞上游壅潰在東光南皮之民不以下游曲防爲懼並藉減壩調劑其平庶爭端亦可消釋從前南支金沙嶺一帶議歸滄民歲修此次工程甚大擬分段酌派東光南皮滄州三處民夫承挑連鹽山境內之工核給高粱一萬餘石銀數千兩俾資津貼仍由官督率催趨期早竣工北支淤塞已久需費更巨而地勢既低尤宜寬築隄防庶免漫溢約計挑河築隄建滾水灰壩及佔用民地發給地價需銀六萬兩以上南北兩支共需高粱一萬餘石銀六萬數千兩其下游積水寬深未能卽估並上游暫可從緩者均不在內直屬各庫空虛本屆工賑需款繁巨咨督同司道竭力設法勻湊事竣照章彙入賑案開單奏報卽責成吳士湘與天津道督同各該州縣認真興辦其有應分別緩急變通之

處隨時相機核酌其南支下游山東海豐境內工段另行核明咨
會山東撫臣轉飭遵照所有查勘山東恩縣德州南運減河直隸
宣惠河淤塞情形現擬籌款將宣惠河挑濬緣由理合恭摺覆

奏伏乞

皇太后

皇上聖鑒訓示謹

奏

請飭東撫築德州隄工片

光緒十年四月十六日

再德州境內運河兩岸工程向係民修民守近年修守廢弛隄身
卑薄據吳士湘稟稱該員順道察勘最險者老君堂吳橋口老虎
倉小楊莊等處十段次險者龍王廟燕窩豐樂屯馬槽等處二十
段而老君堂上年大汛隄劈數十丈幾至決口似此危險至今尙
未修築其民情觀望推諉可知直省之吳橋東光南皮滄州等處
上年水災較重且釀械鬪多命之案實因德州小楊莊決口所致
誠如劉恩溥所奏河決挂淤卽爲腴田益在德州害在直省欲弭
畿南吳橋一帶水患必先籌辦德州險工較修濟南運減河與宣
惠河尤爲緊要直省地處下游經營防範縱極萬全而上游一決
必災及直境十數州縣官吏諉爲隔省小民視若仇讎文牘往還
卽或勉強興工而此十數州縣之民已逃亡相繼此乃關係大局

萬不容已之工亟應欽遵

諭旨實力修防惟災祲之餘勢難專恃民力轉瞬汛期將至擬請
敕下山東撫臣設法籌款趕緊委員勘估擇要興辦加高培厚必
於伏汛以前完工否則兩院殘破如此卽尋常汛漲亦恐漫溢至
防汛事宜並須嚴定官督民守章程庶免臨時譏誤理合附片具
陳伏乞

聖鑒訓示施行謹

奏

奏留盛宣懷片

光緒十年四月十六日

再布政使銜直隸候補道盛宣懷歷辦營務洋務賑務等差均能殫精竭慮不辭勞怨光緒五年津河沈災檄署天津道綜理賑務集捐銀數十萬兼資工撫並裁革天津縣書差供應各項積弊建廣仁堂留養孤寡設戒烟局除民間積癮數千人政聲頗著其創辦輪船招商購船二十餘號積年少入洋商之手者約計二三千萬光緒二年收回美商已佔各口之碼頭又拆廢英商已成之鐵路經前樞臣沈葆楨奏明有案上年委辦各省電綫萬里響應軍報攸賴尤能獨爲其難英商丹商覬覦華電權利臣與總理衙門飭該道執萬國公例與之力爭卒能去其侵造吳淞九龍之陸綫嚴定條款劃海爲界經督臣左宗棠張樹聲奏明有案此皆曾國藩所謂與各國通商宜以商戰者是也該道現經張樹聲等奏調

赴粵何焜等又奏調赴閩奉

批旨前據張樹聲奏請將盛宣懷調往廣東辦理沙面案件一時不能赴閩欽此咨照前來本應遵飭赴粵惟因其督辦各省電報事務繁重廣東非居中之地恐難遙制各局況沙面一案將可結束翼易圖熟悉洋務必能勝任自應令盛宣懷毋庸前赴粵閩仍留直以資臂助臣查盛宣懷精明穩練智慮周詳於交涉重大事件洞悉微結是以經辦數事剛柔得中不為撓屈歷著成效今之熟習洋務者往往於吏治民生易於隔閡究之洋務與吏治不應分爲兩途盛宣懷措施咸宜經權悉協臣昔年曾將該道保薦堪勝關道兼備使才如蒙天恩先試以通商繁劇之地歷練數年當能宏濟艱難緩急可恃臣爲時事需才孔亟起見不敢環於上

聞謹附片密陳伏乞

聖鑒謹

奏

本年二月以前賑捐收數摺
光緒十年四月十六日

奏爲查明本年二月以前收過賑捐應獎銀數恭摺仰祈

聖鑒事竊照順直各屬上年伏秋大水爲災賑需短絀當經設法
籌勸接濟並准部議按常例十成報捐銜封貢監暨推廣報捐銜
封在案茲查自光緒九年秋勸辦起至十二月止共收過各省官
商捐賑銀二十二萬七千十四兩零小米二百石每石時價銀二
兩合銀四百兩高粱一千五百五十一石每石時價銀一兩五錢
合銀二千三百二十六兩零棉衣五萬六百六件照章合銀五萬
六百六兩又自本年正月起到二月底止收捐銀三萬四千六百
四十三兩零以上統共收捐銀三十一萬四千九百九十九兩七錢
四毫隨時分撥災區核實散放並以工代撫據籌賑局司道具詳

請

奏前來臣覆核無異除飭取捐賑官紳履歷照章分批咨部核獎
其有專案奏請獎敘者照數扣除並俟續收捐項積有成數另行
奏報外所有本年二月以前收過賑捐應獎銀數理合恭摺具陳
伏乞

皇太后

皇上聖鑒敕部知照謹

奏

法越交涉議定法約摺

光緒十年四月十七日

奏爲遵

旨籌辦法越交涉與法人講解議定簡明條約畫押竣事恭摺仰

祈

聖鑒事竊臣欽奉光緒十年四月初十日

上諭目前最要者約有數端越南世修職貢爲我藩屬斷不能因
與法人立約致更成憲必與之切實辨明通商一節若在越南地
面互市尙無不可如欲深入雲南內地處處通行將來流弊必多
亟應預爲杜絕劉永福黑旗一軍屢挫法兵爲彼所深恨蓄志驅
除自在意中豈可遂其所欲此次法人侵佔越南衅自彼開我無
失和之意若再索償兵費不特情理所必無亦與各國公法顯背
以上各節均與大局極有關係李鴻章膺此重任宜如何竭力圖

維預籌辨論等因欽此仰蒙

聖明指授機宜

訓誡精切感悚莫名又欽奉四月十四日

諭旨鈔示廷臣議覆各摺令臣迅速覆奏等因法國水師總兵福

祿諾到津於十二日來見所有辨論各節及與商訂簡明條款臣

因繕摺覆陳不及先詳細函致總理各國事務衙門請其恭代進

呈

御覽十五夜接准該衙門電稱奉

旨詳加披閱均尙無傷國體事可允行該大臣卽照所擬辦理嗣

後詳細條目務當悉心籌畫毋滋流弊欽此先是福祿諾與臣議

訂條款卽電請該國外部示遵十五日午刻該總兵接其外部大

臣費理是日辰時覆電云奉國旨子女全權無須提督利士比來

津汝卽與李大臣押定等語彼以條款已就無可改易疊催盡押
定議適臣亦欽奉電

旨准照所擬辦理復將原議五條逐加討論酌改前後款式並按
照洋文約款內字句有略宜增損之處與福祿諾詳確覈定繕寫
成帙遂於十七日申時齊集臣行館校對中法文義無譌公同畫
押蓋印各執一本爲據謹將約本封送軍機處備查仍照錄清摺
恭呈

鑒核竊維法越之事自光緒七年以後曾紀澤與法外部沙美拉
古費理等總理衙門暨臣與法使寶海脫利古等往復辨論案卷
盈帙均無成議愈變愈壞迨山西北甯失陷法燄大張越南臣民
望風降順事勢已無可爲和局幾不能保茲幸

聖朝德威遠被由法人自請講解其始願望未嘗不奢要求未嘗

不力經臣反擬辨折迎機勸導彼亦漸就範圍如

英華四十九

五

諭旨所云職責一節今約內第四款法國約明現與越南議改條約決不插入傷礙中國威望體面字樣並將以前與越南所立各約關涉東京者盡行銷廢蓋因臣指明法越甲戌約內不論何國皆無統屬去年新約有

大清國不得預及南國之政等語顯與中國屬藩體制有礙必須刪改據福祿諾而稱已電告外部令現住越南改約之巴德諾照議刪除彼雖不明認爲我屬邦但無此等違悖語意越王豈敢藉詞苛畔耶又

諭旨所云通商一節今約內第三款許以毗連北圻邊界法越與內地貨物聽憑運銷並約明日後戶遣使臣議定詳細商約稅則其云北圻邊界必不准深入雲南內地明矣查向來紅江上游中

外商人運銷貨物出入鴻境往來不絕本未苛禁將來互市自可
在北圻邊界擇要設關收稅安立章程似覺無甚流弊又

諭旨所云兵費宜拒一節該國上下慮心積慮本欲譌索兵費六
百萬鎊卽各國新報私議皆爲是言臣預屬稅務司德璉琳道員
馬建忠等多方開導復當面嚴詞厲色力與駁斥今約內載明情
願不向中國索償尙屬恭順得懼足以風示各國中國許以北圻
邊界運銷貨物爲有益法國商務俾該外部得有詞以謝議紳亦
爲中法和好互讓之據至劉永福黑旗一軍從前乘法兵單寡之
時屢殲法將法人恨之切齒必欲報復上年曾紀澤堯與該外部
商論由中國設法解散約束而法廷添兵攻取意不稍回去冬克
山西黑旗精銳傷亡甚多已受大創今春劉永福募四千人援北
甯亦不戰而潰其禦大敵何怯也華人專采虛聲僉欲倚以制法

法人固深知其無能爲役此次福祿諾絕未提及我自不便深論將來該國片派使臣若議及此當由岑毓英潘鼎新酌定安置之法惟曰下和議已成法人必無翻覆法兵必漸減撤滇桂邊防各軍亦宜及早切實整練凡不得力之勇營應逐漸裁遣汰無用而留有用出劉永福所部冗雜騷擾與越民爲仇實爲邊境後患擬請

旨密飭雲南廣西督撫臣嚴明約束酌加減汰豫籌安置妥策俾無生事滋擾則保全者多矣據福祿諾云此約專欲消釋中法將開之衅端爲救急止兵起見其餘詳細節目應俟該國片派大臣前來會商該外部初次電覆此約應由議院批准本日續電又云押定條款無須議院覆核福祿諾均經呈閱是兩國既皆定議以後商界事宜儘可從容籌度此皆由

皇太后

皇上宵旰焦勞懷柔大度於以感召遠人效忠孚信前後在事諸王大臣等和衷匡弼贊襄大計得以定艱危於俄頃使數年來法越軼轍不定之議得一結束之方從此保境息民練兵簡器徐圖自強天下幸甚

微臣

躬親是役懍懍焉若朽索之馭六馬疊經局

外責望

聖諭提撕惟以不克稱塞

明詔是懼今雖安速成議非初料所能及其有思慮所不到力量所不及之處尙祈

曲鑒愚誠勿爲浮議所惑庶法越之事由此而定中外邦交從此益固矣所有遵

旨講解議定備明條約畫押竣事各緣由謹繕摺由驛六百里馳

奏仰慰

聖懷伏乞

皇太后

皇上聖鑒訓示施行謹

奏

奏保馬建忠片

光緒十年四月十七日

再臣前因二品銜候選道馬建忠從前游學法國與其官紳習處熟知情偽令在上海偵訪敵情福祿諾過滬時就商一切該道晤水師提督利士比密屬以福祿諾赴津講解必須開誠致敬若帶兵船隨往大沽略露挾之狀臣必不願商辦利士比等恪遵指示福祿諾僅坐一師艦北來過煙臺後復換搭商輪赴津此卽慶壽恆所奏先令兵船退出口岸之意深合大體該道同時回津幫同臣往復辯論頗得剛柔操縱之宜遂能剋期成議實該道之力居多查八年春夏疊經派往朝鮮主持美英德各國議約之事條理精詳嗣朝鮮內亂復委令帶隊前往彈壓理處應手奏效奉旨記名以海關道用旋經吏部以章程不符議駁此次定約竭誠襄助不激不隨動中機要維持大局其勞績尤不可泯該道講實

中西各學心地謹飭才能肆應西人多引重之若蒙

恩存記擢授關道及出使之任必於交涉要務有裨臣為時艱孔

急洋務需才起見據實附片密陳伏乞

聖鑒謹

奏

添設山海關電綫摺

光緒十年四月二十四日

奏爲籌款添設津沽北塘至山海關電綫以速軍報而重防務恭摺仰祈

聖鑒事竊臣前奏設立津滬及浙閩粵陸路電綫又自津至通州陸綫左宗棠張樹聲亦請展辦長江至漢口廣州至龍州電綫分別官款商股辦理均奉

旨允准遵行在案誠以電報呼應捷速雖隔萬里若在戶庭有裨軍國要政爲目前當務之急成效已昭然可見茲查津沽北塘至蘆臺樂亭昌黎山海關經營口直達旅順俱係北洋沿海扼要之區已分駐水陸各軍妥籌防守惟距津道途遙遠軍情瞬息變易非有電報無以速傳遞而赴事機但陸路二千餘里設綫經費約需銀十餘萬兩僅營口一處略有商報其餘皆係軍報商股既不

能招徠北洋亦難籌巨款只可擇要經營復查北塘至山海關一帶爲畿東門戶值此海防喫緊布置尤關重要必須先其所急迅速辦成庶蘆臺樂亭昌黎榆關各路防軍消息靈通頃刻之間可以互相問答調度機宜不致遲誤實爲海防經久之規天津大沽北塘前已由官設綫今應自北塘至山海關依沿海徑路接添當卽派員勘定計程四百餘里暫設單綫一條過河之處購用水綫估需銀三萬餘兩卽期蒞事已飭津海關道周馥電報局道員盛宣懷朱格仁采購料物督飭員匠興工趨辦並將沿途應設局棧巡房妥爲布置此路並無商報應仿照西洋關係國家政務綫由官造之例及廣西梧州至龍州成案卽由官辦現在設綫用款自天津至山海關常年局用巡電修理各費均於北洋海防經費項下核實動撥另行分晰彙案報銷並飭地方文武隨時認真照料

保護勿任損壞所有籌款添設山海關一路電綫以速軍報緣由
恭摺具陳伏乞

皇太后

皇上聖鑒敕部查照謹

奏

請緩鹽課奏銷摺

光緒十年四月二十四日

奏為援案請緩長蘆本屆正課奏銷以恤商艱恭摺仰祈
聖鑒事竊據長蘆鹽運使額勒精額詳稱蘆商正課例限五月奏
銷自同治十年後商情艱窘節經

奏准緩至十月啟徵茲以例限將屆催令各商完納據通綱晉有
孚等一百二十商稟稱商等但能依限完繳曷敢屢次瀆求惟蘆
商疲累情形課運實不能同時並顧一年課帑所出全賴菜秋而
尤以春運為根本有春運則指鹽售銀秋運乃可接築有秋運則
菜鹽銷旺銀回而課易完乃去年各岸大水菜秋多荒銷鹽甚少
應完課款又較歷屆增交二萬餘兩專賴奏銷展緩時日稍資周
轉現當春運喫緊已築運者尙未抵岸銀不能來未築運者且須
籌措鹽價繩帶運腳領告等項其上年未交帑利及帶徵歷年欠

課亦均到限商力萬分拮据今屆正課奏銷委難依限籲懇援案展緩以顧春運該運司詳加體察確係實情若於此時催完必致力不能支徒事參追無裨實際請緩至十月啟徵等情具詳請奏前來臣查長蘆正課前因商情艱窘疊次奏請展緩均已奉旨允准現值餉需支絀但可依限催納斷不容稍事稽延惟體察情形實緣商累已深上年又被大水力益疲敝刻下告運喫緊勢難兼顧課款相應援照歷屆成案籲懇

天恩俯准將光緒十年正課奏銷緩至十月辦理以恤商艱卽以保全課運屆時當督飭運司認真催徵將奉撥京奉各餉仍於年內解清不敢稍任遲誤理合恭摺具陳伏乞

皇太后

皇上聖鑒訓示謹

奏

李文忠公奏稿卷四十九